



Na osnovu člana 193 stav (3) Zakona o upravnom postupku („Sl. glasnik BiH“ broj: 29/02, 12/04, 88/07, 93/09, 41/13 i 53/16) i člana 2.9. stav (1) tačka 17., a u vezi s članom 4.16. Izbornog zakona Bosne i Hercegovine („Sl. glasnik BiH“ broj: 23/01, 7/02, 9/02, 20/02, 25/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 32/10, 18/13, 07/14, 31/16 i 41/20) **odlučujući u ponovnom postupku po zahtjevu političkog subjekta Narodna stranka za Grahovo za povrat novčanih sredstava uplaćenih uz prijavu ovjere na Lokalnim izborima 2020.godine**, Centralna izborna komisija Bosne i Hercegovine je na 35. sjednici održanoj 11.03.2021. godine, donijela

ODLUKU

- (1) Odobrava se povrat novčanog iznosa uplaćenog na ime takse za ovjeru učešća na Lokalnim izborima 2020. godine, političke stranke Narodna stranka za Grahovo, u iznosu od 2.000, 00 KM.
- (2) Povrat novčanog iznosa iz stava (1) ove odluke, izvršiće se na transakcioni račun političke stranke Narodna stranka za Grahovo.
- (3) Za realizaciju ove odluke zadužuje se Odsjek za materijalno-finansijske poslove Sekretarijata Centralne izborne komisije Bosne i Hercegovine.

Obrazloženje

Politička stranka Narodna stranka za Grahovo obratila se dana 29.01.2021. godine, Centralnoj izbornoj komisiji Bosne i Hercegovine sa zahtjevom za povrat uplaćene takse za ovjeru učešća na Lokalnim izborima 2020. godine, u iznosu od 2.000,00 KM s obzirom da je zaključkom Centralne izborne komisije Bosne i Hercegovine broj: 05-1-07-3777/20 od 12.07.2020. godine, prijava političke stranke odbačena kao neblagovremena.

Centralna izborna komisija Bosne i Hercegovine, postupajući po zahtjevu političke stranke Narodna stranka za Grahovo, u predmetu povrata novčanog iznosa na ime uplaćene takse za ovjeru, donijela odluku broj: 05-1-07-3-114/21 od 11.02.2021. godine, kojom se zahtjev odbija kao neosnovan.

Na navedenu odluku Centralne izborne komisije Bosne i Hercegovine, Narodna stranka za Grahovo blagovremeno je izjavila žalbu Apelacionom odjeljenju Suda Bosne i Hercegovine.

Odlučujući o žalbi protiv odluke Centralne izborne komisije Bosne i Hercegovine broj: 05-1-07-3-114/21 od 11.02.2021. godine, Apelaciono odjeljenje Suda Bosne i Hercegovine donijelo je rješenje broj: S1 3 Iž 039792 21 Iž od 18.02.2021. godine, kojim je žalba uvažena, poništena odluka Centralne izborne komisije Bosne i Hercegovine, predmet vraćen na ponovni postupak i donošenje nove odluke, iz razloga što se po mišljenju Suda, pravilnim tumačenjem norme moralo utvrditi da je zahtjev političke stranke Narodna stranka za Grahovo osnovan, jer je pravna posljedica odbacivanja prijave ili odbijanja prijave identična, pa bez obzira što je predmetni zahtjev odbačen i što Izborni zakon BiH, izričito ne propisuje obavezu vraćanja takse u slučaju odbacivanja zahtjeva, s obzirom da Zakon propisuje da se novčani iznos za taksu za ovjeru vraća ako zahtjev za ovjeru političke stranke ili nezavisnog kandidata bude odbijen, valjalo je i u ovom slučaju odobriti vraćanje uplaćene takse.

U ponovnom postupku, Centralna izborna komisija Bosne i Hercegovine, postupajući po drugostepenom rješenju odnosno pravnom shvatanju Apelacionog odjeljenja Suda Bosne i Hercegovine u ovoj pravnoj stvari, odlučila da se političkoj stranci Narodna stranka za Grahovo odobri povrat novčanog iznosa uplaćenog na ime takse za ovjeru u iznosu od 2.000,00 KM.

Na osnovu prethodno navedenog, Centralna izborna komisija Bosne i Hercegovine odlučila je kao u dispozitivu ove odluke.

Pouka o pravnom lijeku: Protiv ove odluke, u skladu sa članom 6.9. stav (2) Izbornog zakona Bosne i Hercegovine, dozvoljena je žalba Apelacionom odjeljenju Suda Bosne i Hercegovine u roku od 2 (slovima: dva) dana od dana objave ove odluke na web stranici Centralne izborne komisije Bosne i Hercegovine, www.izbori.ba.

Žalba se podnosi preko Centralne izborne komisije Bosne i Hercegovine i dostavlja putem faks aparata na broj: 033/251 329 ili neposredno u sjedište Centralne izborne komisije Bosne i Hercegovine, ul. Danijela Ozme br. 7, Sarajevo.

Broj: 05-1-07-3-114/21
Sarajevo, 11.03.2021. godine

Dostaviti:
-Narodna stranka za Grahovo
-Odsjeku za materijalno-finansijske poslove
-a/a

